



CH-7144 Vella, 14/10/2016

Novitads dalla suprastonza communal

Honoraziun Nino Schurter

Il 8 d'october ha ina fiasta per festivar il campion olimpic da mountainbike, Nino Schurter, giu liug a Cuera. Il commember da suprastonza e vischin da Suraua, Clemens Arpagaus, ha purtau il salid dalla vischnaunca Lumnezia e surdau simbolicamein ina ruta da bike che porta il num dil victur olimpic e che meina naven da siu liug nativ tras la Lumnezia. La ruta duei vegnir realisada proximamein.

Plazza da glatsch a Vella

La suprastonza communal ha decidu d'installar sco ils onns vargai ina plazza da glatsch sin il plaz da tennis a Vella. La plazza da glatsch ha ina dimensiun da 12.5 x 30 m e stat a disposiziun denter ils 17/12/2016 ed ils 19/03/2017.

Projectaziun dalla senda panoramica Bündner Rigi – Péz Sezner

La vischnaunca Obersaxen Mundaun ha instradau il project per construir la senda panoramica Bündner Rigi – Péz Mundaun – Hitzeggerkopf – Stein – Péz Sezner. La suprastonza communal ha decidu da surprender la mesadad dils cuosts (ca. CHF 3'000) per projectar la senda.

Surbaghegiada areal Palius a Vella

La cumissiun da baghegiar per la surbaghegiada Palius ha decidu da spustar l'entschatta dallas lavurs dil project sin la proxima primavera. Autramein sedat la resca che la ruosna dil scavament stat aviarta sur unviern. Finamira ei da realisar il project enteifer igl onn 2017.

Punt da sugas Val da Tersnaus

Il 9 da zercladur 2016 ha la radunonza communal approbau il project per construir ina punt da sugas per pedunzs sur la Val da Tersnaus sin la reit da viandar a Suraua. L'entschatta dallas lavurs succeda proximamein.

Annunzias per sanaziuns da vias da meglieraziun per 2017

Projects per sanaziuns da vias da meglieraziun ston vegnir annunziats ordavon agl uffeci d'agricultura dil cantun Grischun e pri si el program da baghegiar digl uffeci cantunal avon ch'els san vegnir realisats. Per 2017 ein la via da Gudigliel a Cumbel e la via nr. 3 a Surcasti vegnidas annunziadas. Tier las sanaziuns settracta ei da pendenzas che sebasan sin conclus ch'ei vegni pri avon la fusiun dallas anteriuras vischnauncas dalla Lumnezia.

Incumbensa per elaborar in preconcept per in archiv cultural ella Lumnezia

Sin proposta dalla fundaziun da cultura Lumnezia ha la suprastonza communal surdau a quell'instituziun l'incumbensa d'elaborar in preconcept per endrizzar in archiv cultural ella Lumnezia. L'idea ei da saver integrar leu ils documents culturals dalla Lumnezia ch'ei vegni rimnai sco era d'archivar novas ovras sco p.ex. ils nums locals che vegnan registrai actualmeins els differents vischinadis.

Representanta dallas pleivs ella cumissiun da giuventetgna

La vischnaunca Lumnezia e las pleivs da Cumbel-Peiden, Suraua, Lumnezia miez, Lumbrein e Vrin han fatg cunvegnas da collaboraziun davart la lavur da giuventetgna. Sco representanta dallas pleivs ei Carla Collenberg da Lumbrein vegnida elegida. Sia incumbensa ei d'intermediar ed informar las pleivs davart las activitads ed ils projects en connex cun la lavur da giuventetgna.

Reservaziuns da localitads

Suenter ch'il menaschi dalla scoletta a Lumbrein ei vegnius dislocaus a Vella stat la stanza a disposiziun allas uniuns ni per occurrenzas privatas. Reservaziuns san succeder sur la pagina d'internet dalla vischnaunca Lumnezia. Medemamein ei la stanza da sesidas en casa da scola ad Uors vegnida integrada ella gliesta da reservaziuns.

Ulivaziun da finanzas 2017

La regenza ha fixau l'ulivaziun da resursas e l'ulivaziun da grevezias topografic-geograficas per igl onn 2017. Per igl onn 2016 ei vegnida fixada da niev la fermezia dallas resursas dallas 114 vischnauncas. Las differenzas dallas calculaziuns dall'ulivaziun da finanzas 2016 vegnan integradas ellas contribuziuns per igl onn 2017. La vischnaunca Lumnezia ha il dretg da suandontas contribuziuns d'ulivaziun da finanzas.

Contribuziun	Ulivaziun 2017	Correctura 2016	Pagament 2017
Ulivaziun da resursas	CHF 735'955	CHF 72'108	CHF 808'063
Ulivaziun grevezia topografic-geografica	CHF 1'958'486	CHF 30'100	CHF 1'988'586

Menaschi tecnic

- Il vehichel communal dil vischinadi da Cumbel ha stuiu vegnir remplazzaus
- Ils canals da lenn sut Pleif a Vella ein vegni remplazzai
- Il rempar da malauras sur Surin ei vegnius svidaus
- Il tschancun encunter il reservuar dall'ovra sin la via digl Uaul da Fiugs a Lumbrein vegn rugalaus actualmein
- A Suraua vegnan il rest dils dumbraders d'aua remplazzai proximamein entras dumbraders cun func

Plazs da sittar dall'armada svizra

L'armada svizra ha decidiu da buca duvrar pli divers plazs da sittar. Ella vischnaunca Lumnezia pertucca quei ils plazs da sittar Alp Sezner, Genastga, Dutschals ed Alp Sogn Carli. Quels plazs ein buca vegni duvrai pli dapi il 2001. Ils plazs da sittar dall'Alp Nova ed anenviars duein aunc vegnir salvai. La suprastonza communal ha decidiu dad ir d'accord da sliagar ils contracts per ils plazs da sittar Alp Sezner, Genastga e Dutschals els vischninadis da Vignogn e Degen ed Alp Sogn Carli el vischinadi da Morissen.